

駐

粵

八

旗

志

駐粵八旗志卷十八目錄

人物志

滿洲八旗歷任佐領防禦驍騎校列傳

伊隆阿

成文

札爾虎

達春太

和順

雪太

華瀚

泰永

得魁

訥爾金

文魁

以上佐領

平順

錢糧保

永安

米格

常慶

文通

文興

吉拉明阿

鐔全

龍祥

得惠

以上防禦

巴揚阿

三經保

套住

靈保

平家保

札布商阿

金莖

吉福

蘇瑪爾漢

庚春

以上驍騎校

駐粵八旗志卷十八

伊隆阿滿洲鑲藍旗人由京旗印務章京奉派駐
粵乾隆二十一年補授廣州駐防滿洲佐領帶兵
來粵水陸長途兵丁營口數百人咸歸管領紀律
嚴明秋毫無犯又善醫藥諸疾病者皆爲診治全
活甚多其死者距京近則運柩回京距粵近則運
柩至粵既抵粵所有分段駐紮定期操演一切規
制悉與協領五十八議之兩閱月而全局始定至
今百餘年莫之能易也年六十卒於官

成文滿洲正紅旗人乾隆二十一年由天津防禦
撥赴廣州駐防適正紅旗佐領出缺卽以成文陞

馬耳 卷一
補挈眷啓行有粵商由天津航海而南邀文領兵
附其船不索值文却之或謂之曰當此北風初起
旬日可達廣州官兵眷屬可省跋涉之勞文不應
後海船行至黑水洋遭風沉失人始服其處事之
慎到粵後將軍一見卽賞識之在任一切稱職後
終於任

札爾虎滿洲鑲白旗人由天津奉調駐防廣州好
學兼通醫理乾隆四十六年任正白旗滿洲佐領
五十二年委令領兵征臺灣將以母老辭母勉以
大義乃備甲馬並載大黃一巨囊以行人問之曰
臺灣地處極南酷暑蒸溼必染癘疫非此不足以

瀉之抵臺未幾時疫大行乃以大黃投病者服之
皆愈一日勒馬督戰忽槍丸自林中出掠左耳而
過驚顧閒寒慄大作歸營其子祿格以庫吐勒隨
征急掖之已不能下鞍逾數日而歿副帥哭臨厚
其棺殮以歸其母歎曰爲國捐軀家之榮也吾何
恨子祿格不慕榮利家居奉祖母以壽終

達春太滿洲正白旗人征臺灣之役以正白旗防
禦隨協領瑪克什布列左翼二隊每戰必躬先士
卒家傳秘方折骨斷筋敷之不浹旬可續完也在
軍中救人甚夥佐領札爾虎卒親與其子經理棺
殮事事盡心將軍卽以其缺補之撤兵後履任三

載遂卒

和順滿洲正紅旗人原名明太幼聰穎從父讀書及長習武知兵乾隆五十二年以甲兵從征臺灣每戰必先登旋粵後補前鋒旋擢鑲紅旗驍騎校和順本繼出嫡母無子葬於京順入都引

見遂運其柩來粵安葬以便拜掃嘉慶六年永安之亂將軍書敬以和順知兵命隨往軍營事平回省遷防禦旋擢本旗佐領訓練操防之外嚴禁婦女入寺燒香又於本旗西壕街擇隙地創建本旗衆姓祖祠以時致祭道光中各旗皆倣行焉母卒哀毀異常道光七年終於任年五十八病篤時將生平所

餘俸金分贈宗族戚友及鄉黨之貧乏者

雪太滿洲正藍旗人以甲兵從征臺灣歷著戰功
凱旋擢鑲白旗驍騎校嘉慶初遷鑲黃旗防禦鑲
白旗佐領性剛直御下嚴時滿兵來粵已逾五十
年未免漸染漢習雪太於見衆兵時每以清語問
之有不能對者立限學習逾期猶不能必加責斥
有稍違禮法必鞭之或以爲太嚴則曰御兵寬則
驕驕則難令所謂慈不治兵也不期年風俗爲之
一變惜未幾遂卒

華瀚滿洲鑲藍旗人以甲兵從征臺灣凱旋敘功
拔補前鋒擢正黃旗驍騎校遷鑲紅旗防禦皆以

勤能著聲尋陞鑲紅旗佐領一切訓練操防諸務靡不殫心爲之自恨少年失學每閱文卷未盡諳悉命其二子文輝文炎孫德克津從宿儒樊夢蛟受學嘉慶七年德克津應童子試受知於學使姚文田入郡庠由是各官家子弟多令向學在任十年卒

泰永字澤亭滿洲鑲紅旗人行止端莊好典籍工書畫少充將軍印務外郎以才技見稱於時乾隆五十八年洊擢至鑲白正藍旗協領後因所轄弁兵不能彈壓土民械鬪部議降一級調用乃以候補人員留辦將軍印務歷數載乃補授鑲紅旗佐

領後年逾七旬遂致仕優游詞翰嘗用滿文繙譯二十四孝圖說藏於家以訓子孫孫溥霖文生員曾孫桂棻繙譯生員

得魁字占元滿洲鑲藍旗人嘉慶二年以甲兵隨副都統和興額往粵西泗城府援剿黔苗疊著戰功得一等功牌一三等功牌一歸旗補正紅旗驍騎校十九年陞鑲紅旗防禦嘗值班小南門有女子八九歲失路哭於柵外得魁呼入問其父母名姓里居皆茫然惟知父名枝指旺己名七巧而已次日有三人先後來認爲女父者得魁令出其手視之皆非枝指卽令軍士將三人送縣審訊皆伏

罪曰此女子實文德里陳氏之女其父外出未歸於是傳里保將此女携還陳氏道光七年擢任正紅旗佐領尤謹於出支之項由是公用漸充於本旗兵丁喪事量加資助衆皆德之後終於官

訥爾金滿洲鑲黃旗人身長七尺雄偉善射由前鋒應嘉慶十八年癸酉科武鄉試雖未經中式而主試蔣攸銛撤闈後稱其才貌於將軍次年拔補正白旗驍騎校充八旗巡邏官時旗境民戶僦居頗多良歹不一訥爾金督率領催里保行保甲法令鄰右五家互相保結有可疑者立即驅逐旗境爲之一清道光三年擢任正白旗佐領時南海舉

人潘澄江在梓德里之紫華禪院講學訥爾金自以漢文未能精通乃執贄受學公餘卽往講習未二載遂通文筆旗中往來文書多就正之焉年六十卒於官

文魁滿洲鑲白正藍旗協領廣德之次子少習武負氣嘗與同儕相毆其父聞之痛加鞭責由是盡易前轍學清書習禮儀焉時川陝匪教未靖奉部文令各駐防將軍簡選銳卒學習長矛以備征調並頒矛槍三十二式至粵將軍福惠命選旗營數人爲教習互相較試諸人初易視文魁及對較皆不能勝後由驍騎校游擢鑲白旗佐領遇事明決

將保舉堪勝外任魁弗願也會鑲紅鑲藍旗協領

缺出以魁擬陪人都途次得寒疾卒於旅舍

以上佐領

平順滿洲正紅旗人家貧性孝友幼時其兄出師

臺灣順在家事親能得堂上歡心及長以馬甲充

當印務外郎每堂期順必捧硯侍將軍側意欲習

公事也嘉慶六年隨將軍出師永安凱旋補前鋒

擢鑲藍旗驍騎校陞鑲紅旗防禦好施與凡察學

及閱孩兒槍公賞外必自加賞年六十以軍政休

致道光辛丑海氛不靖順請於將軍阿精阿願率

兵前敵將軍憫其老未許順固請乃令率正紅旗

滿兵駐紮西城敵樓及事平以露處積受潮溼病

卒

錢糧保滿洲正藍旗人舉止端嚴讀書善騎射由鑲白旗驍騎校擢正藍旗防禦旗內子弟貧能讀書習武者助以膏火爲匪不法者嚴加鞭責旗風爲之一振教子以禮法清文弓馬皆令精習後長子色勒敏官鑲白旗滿洲佐領次子色拉春官鑲黃正白旗滿洲協領

永安滿洲正黃旗人由本旗驍騎校擢正紅旗防禦乾隆丁未分領三隊兵往征臺灣協領伊清阿深倚任之抵臺戒軍士勿貪功妄殺每督陣本隊兵鏖戰最久而斬級最少喜曰必如此方能成大

功彼獻級捉生者豈足信哉前後十戰皆著戰功
後奉令駐守諸羅與文員稽察被難鄉村搜捕從
逆餘孽其中被脅者悉行開釋嚴禁部卒毋許擾
民凱旋記名候陞委署正紅旗佐領未幾卒

米格滿洲鑲白旗人乾隆五十二年由甲兵出師
臺灣有甲兵德裕者與米格共宿一帳房德裕病
米格親煮湯藥時當盛暑穢氣薰蒸或勸其少息
曰同袍疾病扶持者舍我誰屬哉月餘德裕卒米
格撫尸痛哭焚骸囊其骨置諸帳內凱旋歸其家
屬葬焉後由前鋒擢正白旗驍騎校遷鑲白旗防
禦勤慎供職上下咸敬愛之旋卒於官

常慶始名常興後改今名滿洲鑲黃旗人善馬技
工擊刺乾隆五十六年由前鋒營專達陞補鑲黃
旗驍騎校勤敏任事以才幹稱嘉慶二年滿洲副
都統和興額奉

命統廣東綠營兵三千往廣西泗城府界會剿苗匪選親
軍十五員名從征常慶以叻叶哈章京與印務章
京額爾登布二人爲總領官抵營後兼程疾進攻
克册亨苗寨住兵二日復令常慶引兵由後嶺疾
擊阿槁寨老巢斬獲無算苗疆平敘功保

奏

賞戴藍翎並給一等功牌一三等功牌一後擢正白旗防

禦卒於任

文通鑲白正藍旗滿洲協領廣德第三子性聰敏嗜學工文藝嘉慶五年庚申駐防旗人始得就本省應文章試新典初開旗童應試者三十餘人學使薦承風以爲但得畧成文句卽可取錄及閱高天福章維煊及文通諸卷不勝驚喜曰奉文不滿兩載而諸作咸合法度且多英氣於是通與高天福等六名首蒙取錄入郡庠後屢試秋闈弗售遂由騎射擢驍騎校陞任正白旗防禦教訓旗兵以勤習技藝恪守旗箴爲首務閒有違犯者諄切訓飭不輕加以鞭撻後奉派廣西買馬未啓行病卒

文興字鑑齋原名文慶協領廣德少子幼隨兄文通在八旗義學肄業嘉慶十四年己巳出應童試受知於學使胡長齡取入府庠甚有文名會義學掌教某卒衆請文興代主講席砥礪學童甚有規矩後由領催補鑲黃旗驍騎校擢鑲白旗防禦以善導人不事更張事亦無弗治焉終於官有詩稿存於家子承惠道光丁酉科武舉官鑲黃正白旗協領記名簡放副都統自有傳

吉拉明阿滿洲正藍旗人任正白旗防禦乾隆甲戌從征臺灣嘉慶丁巳從征永安道光甲午海口防拒洋人均有勞績而謙退伏處不自炫耀爲前

鋒營總教習性慈愛以利物爲心常手製丸藥贈人一時有吉菩薩之稱年八十有三無疾端坐而卒

錚全滿洲鑲白旗人背微僂聰穎過人弓馬清漢文外旁及星相堪輿之學道光初考取將軍衙門筆帖式改補正白旗驍騎校遷鑲白旗防禦充印務章京管理官學會舉行繙譯試諸童學業未精乃與八旗協領籌脩脯建義學延師訓課定立課程不數年應試遂稱得人卒年六十餘著有葬書擇吉新編藏於家子齊斌亦考取將軍衙門筆帖式後改補正藍旗驍騎校能傳其所學

龍祥滿洲鑲紅旗人道光八年補正黃旗驍騎校
十七年遷鑲藍旗防禦辛丑之役領兵守小南門
一帶城垣嚮夜有三人手執令箭登城云奉參贊
果勇侯令嚴察城守官兵有離伍亂行者立斬衆
軍惶駭祥熟視三人不語密令軍士一人尾之三
人下東城入小巷內一娼家則有四人先在內密
語移時旋相聚飲博軍士歸白龍祥龍祥卽白諸
參贊中軍官兆祥遣卒往擒七人到轅鞠之皆漢
姦也參贊立誅三人餘四人委縣審辦由是城防
加密奸宄潛蹤事平因病乞休家居數載而終

得惠正藍旗滿洲人貌魁偉膂力過人家傳騎射

道光甲午科武舉辛丑之亂靖逆將軍奕山調赴
軍營充擡礮手事平補驍騎校尋遷鑲黃旗防禦
委充右司章京嚴筭慎出納二十餘年未嘗絲
毫錯悞性謹厚與人和易上下咸愛重之年逾六
旬告休自題楹聯云解組羣誇頭未白觀書自喜
眼猶青其廉退如此子成達壬戌

恩科繙譯舉人今官防禦成芳壬戌

恩科武舉 以上防禦

巴揚阿原名班精阿滿洲正黃旗人乾隆三十一
年由天津甲兵奉母攜眷駐粵母病羸乘車稍困
卽背負以行五十二年從征臺灣凱旋補領催每

遇公事有不洽於衆者輒與上官爭年近五旬擢
本旗驍騎校一切公事不避勞瘁母卒哀毀異常
其天性然也年八十餘乃終後其子海俊官鑲白
正藍旗協領孫惠林官正紅旗佐領保林官鑲紅
旗驍騎校

三經保滿洲正紅旗人乾隆二十四年隨父來廣
駐防年十六卽挑補馬甲仍入右翼官學誦習滿
漢經書遂通文藝善楷書充將軍印房外郎久之
補正紅旗下甲喇驍騎校時旗民同城市中往往
有爭鬪之事旗員卽護庇已兵三經保曰此非八
旗之福也吾儕寄居於此結怨旣深後患必大且

非兵以衛民意也乃嚴緝衆兵以法撫綏衆民以禮兵民咸大敬服後終於官子喀勒春官鑲紅鑲藍旗協領

套住滿洲正白旗人官驍騎校性寬厚與物無忤家赤貧藉月餉以贍生疏食粗服晏如也有叔姪爭產者控訴紛如套住止之曰一屋之產能值幾何縱使一人爭勝所得不過百餘金而骨肉成讐貽笑外人不亦愚乎盍將屋變賣平分姪讓叔少許於情理爲協二人服從其訟遂息會應更換澳門監稅旗員將軍察知滿洲防校各員貧而有守者以套住爲最遂特委之知交咸爲之喜套住處

之漠然朝饔夕餼一仍其舊未嘗稍侈焉

靈保原名靈太防禦得惠之祖乾隆五十二年由甲兵從征臺灣有戰功凱旋補鑲白旗驍騎校服官數年一切稱職而尤擅弓馬其子倭什琿孫得惠曾孫成芳俱中武舉皆得家傳

平家保滿洲正藍旗人性節儉不苟取與官正白旗驍騎校掌理馬圈事務撙節公費餽養馬匹既能一律臚肥而每月俱有贏餘不數年積有成數乃於年終以所餘散給本旗中孤寡無依及貧困不能自給者年六十終於官

札布商阿原名札克丹滿洲鑲黃旗人由前鋒補

鑲白旗驍騎校好善樂施日常誦朱柏廬治家格言居家最有禮法所管鑲白旗地界毘連民境最易藏奸乃講求保甲之法實力舉行在職六年卒旗民弔哭者盈庭後其子吉勒圖堪官協領蘇勒發堪官防禦孫善興亦擢驍騎校

金莖滿洲鑲白旗人家貧力學考取將軍衙門筆帖式辦理印務文案年近五十始循資補實缺秩滿改授本旗驍騎校寬以馭衆未嘗鞭撻一人而兵丁咸遵其訓諭無犯科者年六十以疾致仕吉福鑲紅鑲藍旗滿洲協領榮太長子步射強而有準道光中將軍哈豐阿嘗於射圃邀集各官較

射時督標中軍副將慶玉最稱善射發矢多中將軍命吉福與之較連發皆中的後拔補正黃旗驍騎校其弟吉祿業儒甚相友愛終身同居內外無閼言惜享年不永在職數載遂卒

恩科武舉咸豐四年紅匪之亂隨協領來存守永康礮臺充前鋒隊長六月二十六日之戰預料賊必併力撲臺先伏兵鯉魚岡背以備要截賊果由小路分隊前來伏兵齊起擒斬甚多親奪其銅礮一尊賊礮一面餘賊遁去事平敘功保

奏

賁戴藍翎旋拔補鑲黃旗驍騎校專治戰守攻具訓練士卒在職未三載病歿

庚春滿洲鑲紅旗人資質聰穎而好學不倦少充滿洲副都統書記外郎筆札旣工應對復明敏歷任副都統裕瑞烏蘭泰皆器重之辛丑之役副都統駐守西城樓是時軍書旁午羽檄交馳時與諸當事函商軍務其草藁皆庚春手創論事洞叶機宜咸豐初擢補正紅旗驍騎校未幾父與祖母前後亡逝親營墓地日跋涉山野悶染受瘴癘病經年乃愈後擬陞防禦入都引

見行抵信陽州道卒年四十餘

以上驍騎校

卷十八終

駐粵八旗志卷十九目錄

人物志

漢軍八旗叅領佐領防禦驍騎校列傳

朱良弼

劉秉維

金瑞

王南炳

扈明信

趙承繼

邊宗器

羅錦

耿正

章世城

陳貴

賈穗

以上叅領佐領

樊如玉

王軫

王文輔

許鐸

蘇志仁

王純

劉滔

李培滔

王瑞麟

馮驥

唐建元

從興信

劉秉裕

張朝稜

章世塘

楊承雯

官世鐸

鍾維福

白建冰

金茂揚

王國聰

馬連邦

王光華

以上防禦

李稷

金榮陞

商守道

弟守信

楊貴鐸

蕭榮

李戴霖

李雄才

樊振雄

陳延純

孔符玉

白常椿

以上驍騎校

駐粵八旗志卷十九

朱良弼字國輔號東泉原隸漢軍正白旗康熙二十一年由叅領來粵駐防後均勻戶口改隸鑲白旗充將軍印務章京時連陽排搖搆亂將軍嵩祝督兵往剿未諳道里險易良弼據輿地圖記指陳要隘形勢用其說進兵遂克有功無往不利卒年八十餘其後裔以科名仕宦顯者甚衆

劉秉維漢軍鑲黃旗人父廷桂以戰功授本旗佐領加正三品銜康熙二十一年來粵駐防署叅領事旋卒秉維由廕生洊擢叅領駐防之始旗民之情未愜詞訟頻興秉維掌左司刑務平心讞決不

輕加以刑責在職十年兵民悅服子孫以詩禮世其家

金瑞漢軍正白旗人乾隆十七年任本旗叅領管理將軍印務後奉兵部文裁去鑲黃旗叅領缺歸協領兼攝瑞改補鑲黃旗佐領時滿洲兵初至粵遷易兵房添造軍械安撫裁汰丁口百務紛紜皆瑞與協領紆九思悉心經理將軍李侍堯深倚任焉

王南炳漢軍鑲藍旗人躋捷多力將軍和碩額駙福增格立超駝轎之技南炳一躍卽過遂命兼充前鋒營教習未幾補驍騎校洊擢至鑲黃旗佐領

乾隆五十二年從征臺灣領前隊兵前後十餘戰
皆身先士卒得功脾四後年六十卒子連祿以善
射聞

扈明信漢軍鑲紅旗人滇南解馬之役由領催隨
佐領金應鳳前往山川險遠馬匹多病隨行馬醫
治之弗效明信乃自用刀鍼艾火治之輒瘥次年
歸粵補驍騎校旋陞防禦乾隆五十六年擢鑲紅
旗佐領政尙簡靜不爲煩苛年逾六十卒

趙承繼號騰東漢軍正紅旗人嘉慶四年游擢正
紅旗佐領視公事如家事兵丁有不率教者令長
跪堵下聽衆人指數其過復親爲開諭務令愧悔

願改不輕事箠楚以是人皆感服年逾七十乃乞
休時長子彬已官鑲白正藍旗協領生平好爲詩
曾預解馬赴滇之役路經啞泉黑泉諸名蹟皆有
詩紀之晚年與友人結天慶詩社著有今雨集二
卷年八十五乃卒

邊宗器字天球漢軍鑲藍旗人將軍宗室永瑋建
勳才書院肄業者三十人宗器預其選考補隨印
外郎由領催隨征臺灣有功補驍騎校充印務章
京滿洲有婦某不聽其姑教訓姑恚恨自戕承審
官擬婦斬決定獻宗器詳閱供詞實有可矜乃請
於將軍駁令依律定擬爲斬監候遞蒙

恩赦婦遂得不死焉又漢軍閒散李四兒與民人周姓者同行遇客民陳亞成角鬪李四兒先以拳毆之周姓者用刃刺亞成立死縣官承審坐李四兒先毆爲首周姓者爲從宗器謂陳亞成實死於刃並非喝令駁令更正其在印務幾四十年實心任事類如此後擢任鑲紅旗佐領以擬陪協領引

見記名候陞嘉慶十九年卒於任

羅錦字襄文漢軍正黃旗人通滿漢文善騎射乾隆五十二年從征臺灣由領催補本旗驍騎校充印務章京性嚴明能以禮法約兵丁跡弛之士咸就銜勒嘗點驗幼丁見徐榮大異之謂他日必成

令器深加獎勵亦其知人愛才之一端也後洊擢至正紅旗佐領以目疾乞休卒

耿正漢軍正紅旗人嘉慶十一年以隨印外郎隨將軍賽冲阿往臺灣征勦海寇蔡牽等辦理文案時羽書旁午正倚馬疾書無晷刻暇及海甸蕩平敘功

賞驍騎校頂戴遇缺卽補二十一年洊擢至正紅旗佐領尋卒著有南征小記

章世城漢軍正黃旗人由筆帖式在印務博通掌故後改就旗員洊擢至正紅旗佐領仍掌印房事務道光九年將軍慶保以八旗生齒日繁額餉未

敷養贍思有以濟之世城與印務章京張朝祿請
於藩庫雜款餘存內借提銀八萬兩發商生息歲
可得銀八千兩以三千兩按年歸還借款以五千
兩給滿漢貧苦之家以資養贍慶保避其議商於
督撫具

奏奉

旨准行時署將軍巴杭阿令滿漢協領會議務令實惠均
沾世城謂戶口既多每歲五千勢難徧及惟滿洲
現丁口尙少每年分給一千擇其家口衆多錢糧
較少者每分給銀五錢不足則加給一分漢軍丁
口數倍每年分給四千每分給銀三錢其貧戶五

口以上並無錢糧者或給三分兩分唯不得過一兩之數如此則足均沾衆如其言遂稟請施行二十年引年乞休

陳貴字德甫漢軍鑲白旗人協領陳萬國之裔孫也父時雄有隱德卒時貴年甫數歲兄寶令從耆儒樊孟蛟讀性苦鈍乃去學武面黑多力嘗日午腹餒歸視厨下空空乃升庭樹摘果實噉之復往肄習其勤如此中嘉慶戊寅

恩科武舉旋由領催補正藍旗驍騎校洊擢至正藍旗佐領性慈惠不尙威嚴遇兵丁如子姪有過反復開導不遽加呵責有某甲頗事游蕩貴微聞之乃謂

之曰旗人不務本業乃事游蕩苟遭斥革汝身不足惜家有老母妻子能免飢寒乎其人慚不能對由是改行道光二十一年擬陪協領引

見記名同任候陞二十五年年五十四卒於官長子良濟
跡弛有才氣咸豐四年奉調粵西軍營由甲兵彙
保至驍騎校

賞戴藍翎復

賞換花翎在梧州失足落水卒

賈穗字雨田漢軍正藍旗人由領催存擢至鑲黃
旗佐領弓馬嫻熟而沈默寡言遇公事莫決偶發
一議同官皆譴之其達於旗務如此咸豐四年紅

巾之亂督兵阨耆定臺以防東西兩路晝戰夜守積數月備極勞瘁及賊退解嚴敘功

賞戴花翎六年擬補鑲白正藍旗協領以在礮臺積受風溼遂成骹疾引

見奉

旨仍回原任未幾卒

以上參領佐領

樊如玉字楚菴漢軍正白旗人父起鳳康熙初由驍騎校隨征噶爾丹有戰功二十一年設立廣州駐防以防禦來粵如玉通滿漢文藝尤善鳥槍三十七年由領催補驍騎校四十一年連州排徭之亂隨將軍嵩祝往往征未幾徭人受撫敘功借補正

藍旗防禦兼理旗民詞訟事立予判決絕不拘繫
羈留兵民咸頌其德後卒於官

王軫字遂行號雲門漢軍正黃旗人好文學精騎
射乾隆癸酉由正紅旗驍騎校擢正黃旗二甲喇
防禦兼理旗民詞訟事秉公判決無所偏倚政暇
輒爲詩集至千餘篇時旗人未嫻文藝而軫獨開
風氣之先仁和杭編修世駿來嶺南相與唱和今
其集有和王防禦軫草鞵之作軫亦著有唾餘草
四卷藏於家

王文輔漢軍鑲黃旗人由領催洊擢至鑲白旗防
禦管理將軍印務尤嫻繙譯

國語將軍宗室永瑋深器重之時設立勵才書院訓
八旗俊秀子弟以文輔爲之師將軍每與商權政
事凡有益於八旗者必竭力贊成或有過當則多
方婉爲諫止與防禦許鐸同爲八旗所推賴焉

許鐸漢軍鑲黃旗人性寬厚教授右翼官學裁成
甚衆由領催洊擢正白旗防禦充將軍印務章京
外郎小有過誤爲將軍詰責鐸輒自任其咎將軍
永瑋謂其能舍己救人嘆爲長者云時設勵才書
院以鐸與防禦王文輔同爲教習治兵尙和平有
犯法者互訟者皆和顏曉譬多端未嘗妄加鞭撻
後卒於任

蘇志仁號惺菴漢軍正黃旗人好讀書局度閒雅
由領催補正黃旗驍騎校乾隆五十二年擢鑲藍
旗防禦從征臺灣前後十三戰咸出督隊槍丸如
雨屹立不動在軍無事手不釋卷凱旋後回旗任
事一遵常格年逾六十遂引病乞休

王純字質夫漢軍鑲紅旗人性謹飭事親以孝聞
家貧母卒躬操畚鍤營葬嘉慶四年海陞正黃旗
防禦整頓旗俗力反儉樸在職二十餘載乃卒子
建泰等咸能恪守其訓稱禮讓之家焉

劉滔字紹堯漢軍鑲黃旗人年十四失怙家綦貧
率諸弟各勤職業以奉母由領催洊擢至鑲白旗

防禦時弟源官鑲白正藍旗協領滔於公所見源執屬吏禮相接於家則源每事必稟命於滔得允乃敢行長幼之節無少紊所得俸入咸委季弟支用一堂維睦無私財焉子秉寬從征廣西泗城苗匪有戰功後官鑲白旗驍騎校

李培滔漢軍正白旗人幼孤母司氏勤女紅撫育之及長克盡孝道勇力絕人乾隆五十二年從征臺灣每戰獨以左手執大纛右手執刃殺賊終日追奔執纛未嘗歇側凱旋由領催挑補驍騎校考驗之日馬步射俱用十八力弓發矢咸中的焉後擢鑲白旗防禦兵丁小有過誤多從寬宥貧苦者

時或調之其有作奸犯科必痛加鞭撻並傳集素不安分者咸令跪視俾知警戒由是放蕩者皆斂跡改行性剛直雖上官未嘗屈意年五十九卒於官子廷桓孫文蘭諸生

王瑞麟字應符漢軍鑲紅旗人乾隆五十二年從征臺灣每戰奮勇爭先攻克小半天面受槍傷凱旋補驍騎校嘉慶十六年擢正黃旗防禦在職不爲苛細嘗曰人各有心能以恩義服之使之赴湯蹈火弗避也況操防常事耶後卒於官

馮驥字以德漢軍正藍旗人官本旗防禦性沈毅鄙世態營逐公務之暇閉門課子吟詩自娛而已

精醫理戚友間有危證他醫束手者驥立一方卽起後輩白玉張朝祓皆得其傳子弼良弼堯夙遵家法出告反而罔敢或懈焉

唐建元字曉徵水師佐領唐德從子也善騎射尤精拳勇由領催歷擢至鑲白旗防禦勤於訓練本甲喇兵能挽強弓者獨多愛文士晚年亦習爲詩生三女無子其告休得請述懷句云幸遊山澤同麋鹿免爲兒孫作馬牛後優游十餘年年幾八十乃卒

從興信字誠甫漢軍鑲黃旗人貌脩偉躋捷勝人嘉慶二年隨副都統和興額往粵西泗城府界勦

辦黔苗六月抵營戰於冊亨與信陣斬賊級及奪
阿稿寨尤奮勇先登得賞一等功牌九月進解黃
草壩及捧鮓城圍咸在事有功歸由領催補驍騎
校二十三年擢正白旗上甲喇防禦充滿洲副都
統巡捕官值海寇張保猖獗副都統那麟泰籌辦
防堵百務紛紜而性卞急弁兵稍不如意輒加懲
責興信維持調護於其間事多得解後以積勞成
疾卒

劉秉裕協領劉源次子也少讀書通經傳尤善於
國語選將軍印務筆帖式一切章疏文移多出其手
嘉慶七年惠州爛屐四之亂將軍書敬統兵往應

援秉裕隨營辦理文案撤兵後改補驍騎校二十四年擢鑲白旗防禦訓練軍伍以身率先後引年乞休子士英官鑲白正藍旗協領孫安堡官鑲紅鑲藍旗協領皆有傳

張朝祿字景酏協領張韜子幼承家訓諳悉政治通

國書由隨印外郎改補領催洊擢鑲黃旗防禦充印務章京一切章奏文移及八旗政務無不悉心辦理道光九年將軍慶保

奏提銀發商生息朝祿首倡其議事詳在領章世城傳時將軍閣人徐某頗擅威福朝祿獨不假以詞

色後以年老乞休生平精於醫術子肅孫阜銘樹
銘俱以醫擅名於時

章世壩漢軍正黃旗人充本旗漢書官學教習規
範整嚴由領催補本旗驍騎校明悉案牘道光三
年擢本旗防禦兵丁有違犯教令者小則鞭責大
則兼坐其領催家長由是旗中皆懍懍焉後引年
乞休孫文滔諸生曾孫國珍同治癸酉科拔貢
楊承震協領承震胞弟少習繙譯考選將軍印務
筆帖式後由領催改補驍騎校陞本旗防禦屢充
大關澳門監稅委員與兄同居至老相友愛承震
因事賠累出三千金助之事乃解年六十餘卒於

官

官世鐸字振之漢軍正黃旗人父悅讀書善屬文尤工書法由領催補驍騎校入都卒於旅次世鐸尙幼也及長勤習父業工詩善書充滿洲副都統外郎靖逆侯張秉樞愛其楷法出所藏圖冊令題跋由是才名遂著旋由領催補驍騎校道光十五年陞鑲紅旗防禦二十一年洋人兵船駛入省城戒嚴軍士登陴拒守晝夜勞瘁及接戰之日人不暇食世鐸與其友艾姓者備餅食數百斤運饋城上倉猝之際官兵不知其所自來世鐸亦終不言焉著有于役紀畧四卷評碑館詩草二卷

鍾維福字景期漢軍正藍旗人貌脩偉以善馬射
著名由領催洊擢鑲白旗防禦兵丁有過輒用善
言開導不輕加鞭撲充滿洲副都統巡捕官歷任
副都統咸器重之政務多所諮詢維福必舉其利
益八旗者以對委監大關稅務吏役皆以厚德稱
之晚年呈請休致優游數載而卒子鎮傑委驍騎
校孫汝吉諸生

白建冰字凜如漢軍正紅旗人精滿漢文由隨印
外郎改補領催道光二十四年補驍騎校充印務
章京時奉

諭旨暫停各駐防文試改行繙譯各童生學業未成將軍

宗室奕湘

奏請展限兩考乃設立繙譯義學以建冰爲管學官
不數載學業成就及開考一切章程俱由建冰與
印務章京承聯酌定二十七年陞鑲藍旗防禦咸
豐二年卒於官

金茂揚字曜輝漢軍正黃旗人器宇清明由領催
拔補驍騎校道光二十六年陞本旗防禦充左司
章京政務綜覈狡猾者不敢爲姦咸豐四年紅巾
賊起六月來攻省垣茂揚與防禦王國聰分領甲
兵出戰連獲大勝賊屯踞蕭岡棠夏等處爲巢穴
七月初二日旗兵乘勝直抵棠夏村燬其屯壘賊

分伏四處衆三四萬齊圍我軍茂揚且戰且卻及
達三家店僅餘十餘人相隨乃下馬揮刀奮力殺
數賊遂歿於陣

賞雲騎尉世職子海承襲今官鑲紅旗防禦屢膺保薦以
協領用

王國聰字思聖漢軍正白旗人由武生屢應鄉試
弗售道光辛丑海氛不靖以水師兵守鳳凰崗擊
沈敵艘一

賞戴藍翎洊擢鑲黃旗防禦甲寅紅匪來撲省垣領兵迎
擊屢勝後入賊巢焚其屯壘賊伏四起衣甲鬚髮
盡焚力戰時許遂歿於陣

賞雲騎尉世職子廣倫襲

馬連邦漢軍正紅旗人由領催拔補驍騎校咸豐四年紅匪事起連邦領兵防守北城一切軍火器械事事經理應付無闕將軍穆特恩深倚任之棠夏之戰其子醢良歿於陣連邦謂能爲

國捐軀榮莫大焉戒家人勿哭賊平請於將軍收檢弁兵戰骨速於象岡之陽以積功保

賞藍翎六年擢任正紅旗防禦尋卒連邦性誠篤遇事能勞與人交始終無二致尤能赴人緩急子均良今官正黃旗防禦培良廣州協右營千總

王光華字顯廷漢軍鑲藍旗人膂力過人能開兩

石弓與弟光表俱以武藝見稱先後中武舉咸豐四年紅匪事起以領催委帶團練旗勇前後四十餘戰保

賞藍翎十一年擢補正黃旗驍騎校同治十年陞鑲藍旗防禦未幾卒於任

以上防禦

李稷字稔畦漢軍鑲黃旗人習

國書由官學生充印務外郎拔補正藍旗驍騎校充印務章京乾隆五十二年隨征臺灣辦理文案小半天之捷軍士搜賊巢獲婦女孩幼數百名稷訛皆賊擄悉縱遣之凱旋渡海至廈門感疾卒照軍營立功病故例

馬耳方志 卷之十
賞卹焉

金榮陞漢軍鑲紅旗人由甲兵從征臺灣管理軍裝火藥時進攻大小岔押軍火赴陣前至山坳遇十餘人伏匿林內衆以爲賊之奸細欲擒斬之榮陞急止之曰此良民有婦孺在內益知非奸細衆乃捨去及凱旋舟至澎湖颶風大作船破桅折衆伏艙哀號倉猝聞忽紅燈一點飄搖前引舟人大呼曰天妃至矣風急潮順不兩刻已至三沙口衆乃得生皆曰此蓋金榮陞大山坳救脫村民之報也嘉慶二十年榮陞已六十餘猶隨衆挑選將軍本智見之曰旗官如家長惟有德而年尊者衆乃

服況積有軍功乎卽以之擬正得補正黃旗驍騎校在職六年卒

商守道漢軍正白旗人精習

國書乾隆五十八年廣州將軍衙門考筆帖式滿洲漢軍各一員由官學生考取數名按名序補守道弟守信名在第一而守道第四守道補缺後未幾改補鑲白旗驍騎校嚴束兵丁少踰矩範者必繩治之所管下皆斤斤守法至衣履亦不敢少踰制守信亦由筆帖式改補正藍旗驍騎校其約束兵丁亦略如守道官僅一年卒守信子興源諸生屢試弗售充本旗領催嘗倡議本旗鰥寡孤獨無依

者亡歿於公費內加給棺殮銀三兩稟明立案至今不改

楊貴鐸漢軍鑲黃旗人兄弟三人友愛同居嘉慶十三年任正白旗驍騎校時蘭州從逆同犯發配來粵爲奴者甚衆類皆兇狠好鬪貴鐸分得其一爲鑄銅圈綴一銅牌鐫姓名年貌其上並鐫逃匿捉獲送官有賞與人格鬪打死勿論字樣繫於其項使牧馬近郊後各旗皆仿行之奴咸就約束無敢少犯焉子穗道光壬午科武舉從子威今官水師旗營協領

蕭榮字則仁漢軍鑲白旗人由馬甲充滿洲副都

統外郎嘉慶二年隨副都統和興額赴廣西征黔苗進攻冊亨砦苗並力守險自晨至午未能進一賊目手旗指麾榮發火槍擊之賊目滾落厓澗眾齊呼而上遂奪山險直攻賊巢大獲全勝得一等功牌後攻阿稿砦賊巢復殺賊三名凱旋拔補領催九年擢正白旗驍騎校供職勤能尤加意旗中孤寡惜未中壽遽卒

李戴霖字沐原漢軍正黃旗人通文學充將軍印務外郎將軍慶溥深賞識之道光四年擢本旗驍騎校臨事果決訓伍嚴明年僅四十卒弟澤霖嘉慶戊寅舉人選直隸南和縣教諭陞知縣分發山

東署陵縣事旋卒

李雄才漢軍正藍旗人軀幹雄偉膂力絕人由武生應道光乙酉鄉試技勇冠塲以旗籍不得領解首乃取中第二道光十七年拔補正白旗驍騎校待兵衆以禮衆咸敬服在任五載卒

樊振雄漢軍鑲黃旗人父茂齡鑲白正藍旗協領振雄玉貌碩碩望而知爲貴家子性極謙謹遇同輩雖年少者亦趨立道左道光十五年擢本旗驍騎校時茂齡已退老家居遇公事必請訓誨而後行遭父喪哀毀過甚未幾亦卒子增頗有父風同治二年以軍功擢補正藍旗驍騎校惜亦不永其

年

陳廷純漢軍鑲藍旗人性聰敏通滿漢文充將軍印務外郎道光二十六年循資補正紅旗驍騎校充印務章京咸豐元年副都統烏蘭泰奉

命剿辦粵西髮賊廷純與印務章京防禦劉安基隨往辦理文案烏蘭泰深倚任之未幾染受瘴癘與安基先後卒於軍均得

恩卹廕一子入監

孔符玉漢軍正藍旗人饒膂力猿臂善射飲啖兼人道光甲午科武舉辛丑之役以戰功

賞戴藍翎三十年由領催補驍騎校咸豐六年領備戰兵

駐城外防敵登岸七年領本旗兵分守東北城十一月十三日洋船賺入省河併力攻城時總督方撤守城兵大半以節經費符玉段內所領僅十餘人城堞間礮落如雨倉猝調兵拒守莫能登陴三鼓後符玉慷慨行堞間撫循士卒勉以效死報

國兵士皆感泣彌奮黎明礮聲稍歇賊衆麤至濠外蟻附登城符玉立垛口擊落十餘賊俄左右登者已百餘人發連環手槍城上下旗兵死者接踵符玉亦被槍陣亡事定後中外論死戰者咸以符玉爲最勇烈云

賞雲騎尉世職子慶表承襲

白常椿字壽庭漢軍正白旗人弱冠補諸生兼習騎射充滿洲副都統外郎爲都統烏蘭泰所賞咸豐元年

奏帶赴粵西勦辦粵匪管理章奏文案積功

賞戴藍翎以驍騎校補用歸粵補正白旗驍騎校四年土匪事起領兵隨協領王鎮雄守永康臺大小四十餘戰皆身在行閒十一年擬補正白旗防禦入都行抵湖北病卒年四十

以上驍騎校

駐粵八旗志卷十九終

駐粵八旗志卷二十目錄

人物志

水師旗營歷任協領佐領防禦驍騎校列傳

王朝棟

董廷盡

王宗璠

翰章阿

施雄量

劉景祥

樊振緝

以上協領

王 軸

談志俊

王文耀

敏 泰

嚴文楷

于建龍

李廷英

以上佐領

伊昌阿

潘茂隆

以上防禦

楊景

陳曰智

商興鐸

以上號騎校

駐粵八旗志卷二十

王朝棟字達材漢軍正白旗人乾隆十一年設立水師旗營朝棟擢水師協領創立營制於珠江南岸鳳凰崗建造操廳兵房督兵士駕駛師船學習水技與兩翼佐領董廷蓋王軸經理一切至今皆踵其程焉在任五年年六十餘卒

董廷蓋漢軍鑲黃旗人乾隆十一年由鑲黃旗防禦擢水師左翼佐領十六年陞任本營協領先是由外海水師綠營委千把總六員副工兵一百名來教習未幾裁去副工兵五十名歸旗營熟練水技壯丁挑補至是廷蓋復請將千把總撤回其教

習副工兵五十名亦次第撥回原營全在漢軍壯丁內挑補又以兵少船多將繪解船減去二隻均奉部覆允行乃仿虎門協操演陣式繪爲八圖操練數載視外海綠營有過之無不及也在任十餘年乃卒

王宗璠漢軍正白旗人善馳射嫻

國語以領催值班西城將軍陽春蒞粵察閱城垣顧問左右轍位多寡莫能對以問宗璠宗璠操

國語一一詳答將軍異之未幾卽擢補驍騎校遷鑲黃旗防禦臺灣林爽文之亂隨副都統博清額領兵往征後又隨參贊海蘭察追剿莊大田股賊以

奮勇

賞戴花翎後擢水師佐領乾隆六十年擢水師協領在任
七年卒弟宗珩以文學見稱亦官鑲紅鑲藍旗協
領掌將軍印務一切章奏文移皆經其手以老告
休卒孫煥文官本旗驍騎校定畿諸生

翰章阿字遜菴滿洲鑲白旗人由前鋒厯擢至水
師左翼佐領時綠營提標水師有能泅入水底厯
一二刻乃起者每歲虎門會操標兵每以此誇旗
營旗兵健羨之相與學習不數月有泅水底厯鼓
聲三百通乃起者十餘衆防校官求加優獎翰章
阿曰水戰以風帆礮械爲要泅伏水中蛋戶捕魚

馬方元 卷二十一
枝耳安用效之耶次年會操水師兵馬如蛟以沈
伏逾刻歿於洋面衆乃服其先見嘉慶二年陞任
本營協領尤加意繪艦諸船長謂水師成敗全繫
於此恒優其獎賞焉在任幾二十年嘉慶二十年
卒於任

施雄量字毅夫漢軍正黃旗人善騎射尤精通滿
漢文由水師兵乾隆五十二年從征臺灣有斬獲
功嘉慶二年副都統和興額往廣西泗城府界會
剿黔苗雄量爲親軍戰於龍洞及克復阿稿寨咸
在事有工事平回粵後拔補驍騎校二十年歷擢
至水師協領振廢舉遺修理檣帆籌添礮械水技

軍容極其整備掌左司關防性剛果遇事執正兩
舉卓異引

見均交軍機處記名道光十二年卒於任子溥官兩廣督
標中軍副將有傳源 恩貢生

劉景祥漢軍正白旗人由水師兵歷擢本營驍騎
校防禦佐領道光十五年陞任本營協領諳練營
務體恤卒伍每出洋會操必捐己俸添補各兵口
費嚴禁賭博有犯必懲二十年引疾乞休生平喜
交游重然諾與伯兄景茂仲兄景兆相友愛景茂
官鑲黃旗佐領治兵尙嚴長子建元官鑲白旗防
禦擬陪水師佐領入都卒保定旅次次建斌紅匪

之亂由驍騎校領旗勇屢著戰功

賞戴藍翎擢正藍旗防禦尋卒

樊振韜漢軍鑲黃旗人道光二十一年由鑲黃旗佐領擢任水師協領時洋人和議既定當事於鳳凰崗左右增建礮臺添置大礮以爲屏蔽又將粵紳潘仕成捐造大船一長十餘丈上下兩層安設三千觔銅礮及千觔鐵礮四十位歸旗營駕駛演放振韜以內河水淺船重駕駛不靈請將此船交出爲外洋水軍巡防之用乃可得力又以鳳凰崗營隔江戍守呼應不便而粵秀山神安礮臺在旗境以營兵防守亦未盡一宜互相更換以綠營兵

守鳳凰崗水師旗營兵守神安臺別於城東臨江
宏廟前建設水師營操廳四時操演將軍奕湘先
後據實上

奏得

旨允行咸豐七年防守東北一帶城垣與洋人接戰身受
重傷歸病經年卒子鐸官本旗驍騎校

以上協領

王軸字仲安漢軍正黃旗人父曰勲官防禦康熙
壬午攻剿連陽排徭著有戰功軸其次子也以辦
事勤能由甲兵洊擢至本旗三甲喇防禦乾隆十
一年設立水師營遂擢爲右翼佐領與新任協領
王朝棟左翼佐領董廷蓋三人悉心經畫事皆經

久可行軸以本營每年需用火藥約二千餘觔戰船與陸路迥殊必須加工製造乃博詢匠手並自出新意其藥果與他局迥殊至今粵省猶以水師旗營所造爲最精焉在任十餘年營兵樂爲之用公事之暇與弟軫以詩相唱和軫官防禦有傳談志俊漢軍鑲白旗人防禦談輔庭長子也由領催拔補鑲黃旗驍騎校擢正藍旗防禦乾隆三十三年雲南解馬之役志俊爲第三起解馬官敘功加一級三十六年調水師營防禦未幾擢本營左翼佐領時鳳凰崗營地無多軍士弗克聚居志俊乃闢城西旗境餘地搭蓋兵房遂得安處在職潔

已奉公厯任十有八年乃引年乞休其子孫科第連綿今推爲望族云

王文耀漢軍鑲黃旗人充水師兵以曉習風信潮汐積功拔補本營驍騎校乾隆五十二年從征臺灣隨參贊海蘭察剿賊於雙溪寨至三槐堡有大溪阻前約三十餘丈奔流湍急參贊將策馬渡諸將力阻之賊乃隔溪笑詈以巨石投人文耀挺長矛呼曰敢死者來遂騰身赴溪我兵從之相繼而進直搗賊巢擒斬無算凱旋後陞補右翼防禦訓練軍士身自習流緣檣嘉慶九年陞授本營左翼佐領其生平惟以忠信服人年逾七十卒於官孫

鎮雄今官鑲黃正白旗協領記名簡放副都統鎮
江正藍旗驍騎校鎮綱正藍旗防禦曾孫汝梅鑲
黃旗防禦

敏泰滿洲鑲黃旗人乾隆四十八年擢任水師右
翼佐領五十一年統水師官兵從征臺灣新店之
戰賊勢頗驕水師兵初逢戰陣勇氣甚盛槍箭疊
發直撲賊營賊大潰我兵奮力窮追生擒偽帥廖
東僞軍師連清水等水師旗兵之功爲多十二月
初五日大戰於集集埔賊阻深溪立石壘自固發
火器遙擊我兵有屯練及黔卒數十人持木牌方
泗渡不丈許水已沒頂淹斃十餘人敏泰顧領隊

王文耀曰今日爲我水師奏奇捷處也文耀聞言卽與衆兵齊投溪鳧飛登岸參贊海蘭察遂麾兵策馬浮過直逼賊壘斬獲不計其數叙功又以水師旗營兵爲最凱旋在任候陞乾隆六十年卒於官

嚴文楷字鈞範漢軍正白旗人由水師兵拔補驍騎校嘉慶十三年海盜張保郭學顯肆行劫掠民不聊生制軍百齡下令封江斷其接濟無所得食於是盜艘數百內犯省河四民大震沿江戒嚴文楷時充右副都統巡捕官白於副都統張秉樞曰海賊急於求食擁衆以脅制軍耳非敢攻城奪地

也然亂不可不防宜聯絡中廣協兵防守城垣調
順德協兵以爲外援旗兵扼守中權賊無能爲也
秉樞商於制軍亦以爲然於是調集旗營水師官
兵防守鳳凰崗本汛布列嚴密賊不敢犯斜趨三
山掠諸村仍未能足食遂決計乞降文楷由是見
知二十二年游擢至左翼佐領二十四年終於任
于建能漢軍正紅旗人少習拳勇放縱不羈後乃
感奮讀書由水師兵拔補右翼驍騎校兼充將軍
印務章京嘉慶二十四年游擢至本營左翼佐領
營中有史姓邵姓者性惡不悛其族長均欲置之
死請於建能建能曰無庸可令來署朝夕應役我

當有以教之不數月二人皆遵循禮法後卒爲善士云子士修諸生

李廷英漢軍正藍旗人父顯揚本旗防禦以好善稱廷英少充水師兵習水技善騎射年二十餘補本營驍騎校道光三十年洊陞本營佐領性誠樸與人語訥訥不出諸口咸豐四年土匪事起六月賊衆數萬由花縣來撲省垣先是副將崔大桐督兵駐守北門外耆定臺廷英領兵守永康臺大桐奉調往北路剿捕賊黨至棠夏遇伏戰歿賊遂擁至北郊時耆定臺留守兵僅數十名賊分黨數百力攻守臺兵不能支將棄去廷英所守臺相距僅

里許急督本隊兵馳至發銃斃賊百餘餘皆披靡
廷英揮兵追擊賊大潰臺以獲全七月十八日率
兵擊賊衆於三家店戰方酣天忽沈黑時我兵進
戰皆持火器遇雨則不得施而賊衆慣行泥淖中
遇雨則勢益張廷英戰且退未及一里大雨如注
水漫不辨道路賊大股冒雨而進廷英短兵接戰
其親軍蕭增靄以身蔽之受數十刃而仆廷英復
手刃數賊陷溝塍中遂被害年四十一長子鳳翔
以先十餘日亦陣亡廷英得

賞雲騎尉世職其嫡孫忠承襲

以上佐領

伊昌阿滿洲正藍旗人乾隆二十六年由天津撥

赴廣州駐防補本旗驍騎校三十六年擢水師營左翼防禦本自水師兵出身於營務素所熟悉時值大修戰船赴廠監工不受餽遺木料尺寸逐一驗明烙印存記嚴戒從役毋得需索如期往收工料俱極精良在任嚴於訓伍後卒於官

潘茂隆漢軍鑲白旗人趨捷多力能負數斗栗越八尺溝自少充水師兵嘉慶二十四年由本營驍騎校擢左翼防禦自充兵以至爲官未嘗一日離師船嫻習駕駛於洋面風潮稱最熟焉後以風痺乞休

以上防禦

楊景漢軍鑲藍旗人乾隆十一年初立水師旗營

由陽江香山虎門調千把總六員教習兵衆景最先諳熟賞七品頂戴委署把總充教習焉至三十七年始拔補右翼驍騎校厯事旣久於內河外洋風信潮汐無不練悉營中事務上官先必與商度而後行焉年近七十乃乞休

陳曰智漢軍正白旗人由水師兵充當本營外郎以明敏稱營制船隻大修拆造年分造具清冊移知督糧道咨會鹽運司交廠造辦其操防火藥咨文理事同知請領硝磺製造而各衙書吏於文書到日必先索冊費否則多方挑駁甚或剗改原文以便需索及曰智掌案必詳錄部文及厯來成案

咨行無可挑駁之處將冊費盡行裁撤書吏無如
之何事且速成協領施雄量知其才拔補領催道
光九年擢左翼驍騎校闔營稱得人焉在任七年
尤以體恤窮苦兵丁爲務遇有喪事創立公幫以
助其家至今仿行卒年五十餘

商興鐸漢軍正白旗人由水師兵洊擢右翼驍騎
校管理漿船泊珠江漱珠橋畔遇民舍火災及
有盜賊卽率兵登岸救護捉賊不遺餘力或謂此
地方汎舟事與旗營無涉何自苦爲興鐸曰不然
泊船於此卽與汎地同居民遭難何可妄分畛域
坐視弗救後終於官 以上驍騎校

駐粵八旗志卷二十終